

素堂說

稼堂陳人

畏友宇野士行。一日語余曰。吾嘗讀中庸。自號曰素堂。請君爲之說。余曰諾。乃曰。天地俯仰。其道一而已矣。夫天道得一而明。地道得一而固。人道其無一而可乎。故曰。惟一惟精。不其然乎。故一其德。是爲大人。二三其德。是爲小人。治者之所以成治。以一其方也。學者之所以成學。以一其志也。一之不可已。其如此矣。今中庸之所謂。其意不在茲乎。君子素於其位而行。不願乎其外。素富貴。行於富貴。素貧賤。行乎貧賤。素夷狄。行乎夷狄。素患難。行於患難。君子無入而不自得焉。夫行者。何。行其一也。其一何。其所主也。漢人謂之獨立之操。西人謂之自主之權。其所主異。而其所主則一也。嗚乎。一心所主。既定矣。則劍山刀樹。起於脚下。而不懼矣。疾雷掣電。掠於耳邊。而不驚矣。人生之快樂。實在此矣。余之應聘於金澤學校。君既在焉。觀其投徒。聞若無人。余知其異於常人。而與君語。恰如舊識。其後往來徵逐。常訪忘歸。不啻牛醫之子也。抑今日。世叔俗漓。不論上下。不問官民。附熱逐臭。拂髻舐痔。不復知人間有羞耻之事。語之於妻子。而不泣者。幾希矣。嗚乎。處斯滔々之世。而執其一而不動。素其位而不移者。抑誰哉。不知君之所志。在茲乎否。士拊掌曰。得矣。乃書以爲贈。

乙未新年書懷

教授 秋月胤永

進軍知略取天津。柳樹伸眉梅動唇。天意方欣歸我厚。龍顏有喜與年新。敵無堅陣標忠烈。虜已稱臣看法真。諸將苦寒應徹骨。翻思雪戰幼時春。